

白水縣志卷之一

知縣梁善長修

地理志

惟王體國經野莫先於地地者所以承乎天而大其利於人也白水雖蕞爾區而陰陽和會以虛為用以實為體者均可訓而圖也剛柔燥溼高深險易皆可分而畫也成形成色因乎土宜關乎人事又無不可由常而知變也蓋地之氣脉不可分而地之條理不容紊知其不可紊則所以綱維乎地者政之權輿也志地理

白水縣志

卷之一地理

星野

一

星野

自晉界起井十二度東井一度至十度今山西分盡二十三度過鬼四

度至柳六度史記柳分凡三十二度主秦雍州漢班固蔡邕起井十

清類天文分野書起井九度至柳三度說各略異考春秋

傳秦彭衙地為今白水之境在府治極西差北古雍州之

域當東井十二度之既為鶉首分鶉赤鳳也或稱朱鳥又稱朱雀在南方離位七

宿共六十四星東井八星為鶉首輿鬼與鶉首相接天漢為井鬼所居附

列井鬼之星如鉞如積水如積薪如水位如水府如積尸

氣如燿又皆與井鬼同宮司事者也故占驗及之

占驗

東井八星其形如井橫列兩河之陰當地絡之西北為天之南門北連黃道七曜常行其中主水衡法令平中之事

凡物莫平於水營國建邑治地分田皆取象焉王者用法

平則井星明而端列若暗小不端則國弱政亂月宿井則

有風雨太白金星也在西北乾位乾金色白守井五穀不

成歲星木星也四周有四犯兩星之光相接井近臣為亂

兵起填星形如瓜兩側有入井大水傷人客星非恒有謂

無專屬高誘以勾星為凡五星明而犯井大臣誅戮彗星生鋒曰芒芒

白水縣志

卷之一地理

星野

一一

長曰角角長而偏出曰彗彗形如犯井國大人死井上有

雲氣歲多水潦

鉞一星形曲色黑在東井西主治淫奢事若明大與井宿

齊或搖動或五星犯守則用鉞於大臣

南河一名陽門在鉞之南**北河**一名陰門在鉞之北兩河

各兩星

本釋史星圖或云各三星

夾東井為天之關門日月五星之常

道河即天漢金之散氣水之精華浮上者也其星如郎位

旄頭而微細望之若河以十月收以二月見主關梁河渠

安不見則道不通水泛溢搖動

人叛日月行兩河串道民安歲美出中道之南大臣不附
熒惑_也^{火星}守南北河兵起穀不成客星彗星犯南河爲旱
犯北河爲水南河有蒼白雲氣入犯之河道不通出而色
赤天子兵向諸侯黃雲氣入王者有德令出爲災青雲氣
入水傷人北河有蒼白雲氣入犯之邊境有兵民疾疫
積水一星在北河之西北主聚羨水供天子酒食明則天
下安燕享行暗則五穀不登人民憂動搖則江海泛溢津
梁不通五星犯守爲水熒惑獨犯之爲旱蒼白雲氣入犯
之有大水

白水縣志

卷之一地理

星野

三

積薪一星在北河之西北積水之東主供庖厨明則五穀
熟享祀修暗則旱饑庖厨空積水積薪相去五尺以內則
天下康平至一丈則歲饑民流熒惑守之旱辰星_也^{水星}守
之大水赤雲氣入犯之爲火災

水位四星在東井之西南積薪之東主瀉滯溢色赤_{天象}^{釋史}

_圖下兩星徵黑微小如常則雨澤時明大及上近北河則水橫流

五穀傷五星犯之大水入城郭傷人五星守北大水守南
大旱客星守之百川泛溢彗孛_也^{孛彗類芒氣四出孛孛然}
犯之水路不通赤雲氣入犯之

永府四星色赤

上兩星微黑

在井東南亦主水衡事

輿鬼四星

或曰五星兼中

謂之天廟

本博雅

天廟天子之廟

祖考之象也居兩河之陽與鶉首相接當地絡之東南主

內外祠祀事四星形方似櫃東北星主積馬東南星主積

兵西南星主積布帛西北星主積金玉故一名天櫃又主

疾病死喪故又名天壙明則五穀成不明則否動搖則賦

重徭繁有疾病水災人死月入犯之多疾疫雲氣入犯之

黑白為憂疾赤為旱黃為土功

鬼中色白似星非星似雲非雲者曰積尸氣又曰天尸尸

白水縣志

卷之一地理

星野

四

神象也主祠祀事或云一名質

質與櫃鑕通莖榘也

主刑

罰誅斬不明天下安明則兵起大臣誅下人死搖動則疾

病多雲氣入犯之白為貴臣有憂青為病

燿四星在鬼之西北主烽火色黑如常吉明大則邊庭有

患赤雲氣入犯亦如之

祥異

上古

黃帝時雨粟

漢

丙申

高祖三年

大饑民多徙

丁卯

文帝六年

大旱蝗

元鼎二年三月大雨雪平地五尺

元鼎漢武帝年號帝王建元自武帝始

五鳳四年大有

後漢

建武二年大饑

延光三年秋七月甘露降有木連理

在古彭衙地載後漢書符瑞志

晉

太康元年秋七月木連理

白水縣志

卷之一地理

祥異

五

臨潼志載晉太康元年粟邑生連理木考臨潼之粟邑

唐改平陵縣建者晉武帝時猶未有粟邑晉書祥瑞志

云連理木生馮翊粟邑乃白水也

前趙光初間雷震劉曜父墓

北魏

延昌四年春正月地震

隋

開皇十四年秋八月大旱饑

唐

永淳元年夏五月旱蝗

天寶十五年旱

貞元元年大旱饑

二年大有

元

泰定二年夏四月雨雹

載五行志

天歷二年秋七月旱蝗大饑人相食

至順二年秋七月有蝗

載五行志

明

白水縣志

卷之一地理

祥異

六

洪武三年大有

宣德三年旱饑

正統二年饑

十年大疫

十二年冬無雪

成化六年夏四月旱饑

十年秋蝗食禾及草木俱盡民饑

二十年夏六月旱饑地震

二十一年大饑民徙

十六年夏五月大旱疫

十七年興教寺後殿火

三十四年夏五月丁丑有星自西北流於東北大如盂色

赤有光 是歲李自成與張獻忠同時生 六月丙辰地震

三十七年夏四月十六日明倫堂上梁有五色雲氣盤繞

移時乃散 五月十七日雨雹不傷麥 泰嶽廟碑記云初

風自泰嶽廟出聲如破釜有色間紫赤大蓋地數十畝直衝雲而散

四十一年大有

四十四年秋八月蝗 九月蝗生子 舊志蝗生蝻謂蝗子也而韻書無蝻字

白水縣志

卷之一地理

祥異

八

四十七年有秋

崇禎元年春三月二十五日天赤如血至巳時漸黃日始

出自夏四月至秋八月雨暘不時隕霜殺禾民饑 此盜起之始

六年大饑

十年冬十二月地大震

十二年秋七月有蝗 八月大雨雹傷禾 載二申野錄

十三年大旱饑

十四年夏六月有蝗

本朝

順治四年蝗饑

康熙二十九年秋八月七日雨黑蟲長寸許蔽地盈林其
狀甚惡秋禾受傷兩日倏然不見
載知縣鈕
琇觚牘

三十年旱蝗民饑

三十一年大旱饑
恩旨賑恤 奉

三十四年夏四月丁酉地震

六十年旱饑

雍正十三年旱饑
恩旨賑恤 奉

乾隆三年夏四月大雨雹傷麥
恩旨賑恤 奉

白水縣志

卷之一地理

祥異

九

四年冬十一月丁卯地震有聲

十年秋八月辛亥大雨雹傷禾

十三年夏無麥 秋大旱饑
恩旨賑恤 奉 八月庚子北蓋

村民高從禮妻張氏一產三男
奉旨賞給
米布銀拾兩

十五年秋八月戊子雷電雨雹傷蕎麥

十六年大有

十七年夏六月旱 秋九月雨水傷禾
恩旨賑恤 奉

十九年夏麥大穫

兵寇

周

襄王二十七年春二月甲子晉侯及秦師戰於彭衙秦師敗績 冬晉先且居宋公子成陳轅選鄭公子歸生伐秦取汪及彭衙

漢

建元元年秋七月鄧禹渡河破左輔兵於衙

晉

元康六年盧水胡反上命都尉張光戍馬蘭山即秦山 縣北

建興三年冬十月劉曜進軍屯粟邑陷馮翊尋敗歸平陽

白水縣志

卷之一地理

兵寇

十

後復據粟邑

北魏

孝昌初賊將息阿非圍白水

大統十年冬大閱於白水

十一年冬大閱於白水大統六年夏茹茹渡河上召諸軍屯沙苑備變至是兩年皆在白水

訓練軍馬 夏西戎國名茹茹即蠕蠕 大閱演武之名閱閱年貌也按冊查閱年貌訓練士卒也

永泰間吐番西羌之屬居入犯任敷以兵五千掠白水

明

正德七年冬十一月洛川妖賊邵進祿率衆由黃龍山據

彭衙寨肆掠潼關兵備道張禴擊敗之

嘉靖三十二年秋八月北虜犯鄜州漸逼白水潼關兵備道張翰移兵守暗門虜偵知引去

崇禎二年洛河北民王二种光道聚眾為盜參政劉應遇

擊散之王二被斬崇禎元年陝西大饑府谷賊王嘉允宜川賊王左掛等一時並起攻城堡殺官

吏河北民王二种光道亦聚眾數百人為盜官軍進剿以不諳地勢陷敗二年春詔以楊鶴為三邊總督捕之參政

劉應遇擊斬王二參議洪承疇擊破王左掛賊乃稍懼遁散詳王志及明史

十一年官軍大破李賊於潼關自成引殘騎遁匿商雒尋來奔白水

白水縣志

卷之一地理

兵寇

十一

十二年李賊潛入城陷知縣王無逸死之

十六年冬李賊潛入城再陷知縣朱迴澆訓導魏歲典史

劉進俱被難

本朝

順治元年冬十二月李賊自同州過白水北趨延安戰敗

復奔白水所至劫掠

二年李賊又潛入城陷知縣索應運自經死

年分未詳 年李賊復破城毀廟學衙署幾盡署縣事趙瀚被執

誘降不屈遂被殺

康熙十七年大將軍圖海兵下平涼檄典史趙煥文招撫
流散至棧口遇賊死

六十年遠近饑民盤聚源和山中爲亂二月官兵圍殺之

山水

五龍山在縣東南四十里謂之五龍者五山相連蜿蜒如

龍也鄉民單名龍山又曰南岡隨其起伏之勢結廬而居

每夕陽倒射岩光掩映雲樹交輝宛然一畫圖焉邑人并

斗有龍山夕照詩

見藝文志
縣俱收入

此山接蒲城界故府志兩
按縣南十五里差西背見

者爲堯山西南四十里側峙者爲明王山由南轉東爲縣
之巽峰者金粟山此三山皆屬蒲城舊志兼載今削之

白水縣志

卷之一地理

山水

十一

洛河坡在縣東北三十五里河北四里民往來通衢陡峻

險隘十八折而始至頂俗名曰十八盤

黃龍山在縣東北六十里盤衍如龍土皆黃色故名魏書

地形志姚谷縣有黃崖山舊志姚谷故城在今縣東北近

黃龍山則黃龍山卽黃崖山也

舊志黃龍山東二里有陽
武山倉聖發靈之區按河

圖玉版云倉聖南巡登陽虛之山虛穆天子傳作紆一作
盱又作噓於音之訛也陽紆山卽陽華山綿互三千四百
里在雒南縣洛水之北陽武村無陽武山削不載
訛傳耳今縣北境有陽武村無陽武山削不載

源和山在縣西二十里高百丈許與明王山遙對有數

小坵山朝護白水繞其後左右皆有溝澗狀如沼上蓮花

絕頂有四五神祠

秦山在縣西北六十里本名馬蘭蘭一作蓮 古音通 山北條山

之一枝也舊志小秦王至此軍不得過王下馬禱之山自

崩解云山之上有暗門路通中 部宜君 下有苜蓿溝乾隆二年白 水宜君兩邑

民互爭山地因此分界 豎碑山麓府邑並有案 四面峰廻巒接最幽僻高寒者

香爐峰也雖久晴雪凝不化日華東射朗如玉立訓導黎

世和有秦山霽雪詩見藝 文志

方山與秦山相連其形方峻四面多石下有馬跑泉

大神山自北條來俗稱高山又稱神嶺在縣西北七十里

白水縣志

卷之一地理

山水

十二

其形陡峭每日出時山川和氣結而為雲瑞彩祥光變幻

無端若有神焉訓導何學有神嶺朝雲詩見藝 文志

縣西北有山原二一曰**北山原**離縣五里其南曰**南山原**

離縣三里兩原相直秦山之脉至此隆起邈迤王志所謂

從亥轉艮下臂逆潦水結縣者

洛水魚豢典略漢火行忌水洛字去水加佳明熹 宗名常洛天啟初諱洛為維今志多作維 自縣北

宜君縣界來抵黃龍山麓逕秦山暗門東流逕南紀岡過

田家阿門等村循五龍山陰轉南入蒲城界其源發於環

縣白於山舊至華陰葫蘆灘入渭明成化中朝邑岸崩而

入於河不復入渭

此漢書所謂西洛水也威烈王十八年秦塹雒卽此前

漢書溝洫志言臨晉民穿渠自徵今澄引雒水至商顏

顏師古注商顏商山之顏也劉奉世謂洛水南入渭去商山甚遠何由穿渠至其下按府志同州之北有商原

所謂商顏下溉田白水之洛一往皆陵阜夾束驟長驟

消消則僅一二尺長則倏至數丈浸崖没岸奔騰洶湧

舟楫不敢渡然不越日而流又消矣瀕洛而居者欲引

灌田畝無所施其智焉

白水以水色白而名自縣西北同官縣界來逕蒲城下莊

白水縣志

卷之一地理

山水

十四

村流十里而至縣境以水中多小白石故曰白石河杜甫沙苑

行云左輔白沙如白水仇注白水縣東南谷多白土西流受龍門溝水又受虎頭溝

水至南臨川折而東之逕阿門村東入洛白水自白石河至阿門村凡七

十餘里鄉民各以傍水村居爲名

舊志謂白石河縣南入漆漆從同官東曲回趨南折至

臨川距縣五里東南入洛按今縣西北境只有白石一

河自同官來府志云白水同官烏泥川之下流非別有所謂漆水

水出同官北高山以其清碧如漆而名東南流與同官

川水合又東會沮水入耀州東南入渭韓汝慶朝邑志謂漆至朝邑東

南三十里入渭誤 此卽禹貢所謂漆沮既從之漆在豐涇之下

麟遊武功永壽諸縣之漆在豐涇之上乃詩之所謂漆也 不至縣境井豐彭衙雜錄

云白水非漆水豐白水人見聞必確惜未詳辨故仍畱

疑團耳而水經注何以云沮水東逕粟邑注於洛水寔

宇記何以亦云洛水東南沮水入焉蓋前人未審漆沮

二水源流分合既誤以白水為漆水又誤以漆水為沮

水故也至洛與漆沮迥然不同洛源出延安子午谷漆

沮在耀之頻陽官今同 不知顏師古何據而謂洛卽漆沮

也善長詢之同官人云北高山漆水其流甚短惟沮水

白水縣志

卷之一地理

山水

十五

流至耀州逕富平臨潼入渭然則禹貢之所謂漆沮正

在耀州同官卽富平臨潼諸川水亦不得以漆名矣大

抵關中之水冒名漆沮者多白水亦其一也

姚谷水

郡國縣道記作柳谷水姚柳音訛

一名彭衙水鄉民曰孔走河以

其孔走鎮而名在縣東北黃龍山左自澄城梁家山南過

縣境流三十里至齊家渡入洛

鐵牛河秦山南五泉之水也在縣北三十里逕武子渠村

東流三十五里入洛

武子渠在縣北四十里舊引鐵牛河水灌田今堙廢

東陽溝水在縣東五里南逕乾耳村注於白水

鳳凰溝水在縣東十里府志二十里誤南流入洛

虎頭溝水在縣西一里許南注於白水

龍門溝水在縣西二里許南注於白水

雷衙溝在縣東北二十五里水從石穴滲出澄瑩徹底

清水溝在縣東北三十五里兩岸皆崇岡疊嶂氣蒸爲泉

冬夏不竭流三里許入洛

疆域 志縣治南堯山一帶及罕井村等處前明割入蒲城未詳其年

白水幅員計三百一十餘里廣八十里袤延八十里東至

白水縣志

卷之一地理

疆域

洛河澄城縣界四十里西至白石河蒲城縣界四十里南

至臨川舖蒲城縣界十里北至洛川縣界七十里東南至

故現村蒲城縣界三十五里西南至西河下蒲城縣界五

里東北至孔走鎮澄城縣界六十里西北至宜君縣界七

十里

東至澄城縣治九十里南至蒲城縣治五十里西南至宮

平縣治百四十里北至洛川縣治二百一十里西北至宜

君縣治百六十里東南至府治由五龍山百二十里由

城百三十里至省二百九十里至

北京由河南二千五百七十里由山西二千二百里

形勝

北主秦峰南竇堯巘謂蒲城西環白水東繞洛川虎踞右

溪謂虎頭溝鳳飛左澗謂鳳溝鐵牛鎮壓於後謂鐵牛河龍門鎖鑰於

前謂龍門溝邊幅偏殺氣脉攸全古雍秦之善地也

封采封謂封邑采謂采地古封國邑以戶所封之戶以租庸調給

陽武路史國名紀云古國有陽武考倉聖廟碑記倉頡為

黃帝時諸侯今陽武村地疑即倉頡所封

彭戲路史國名紀云周世侯伯之國後滅於戎為戎國號

白水縣志

卷之一地理

疆域

十七

史記秦武公元年伐彭戲氏至於華山

彭衙在縣東北六十里春秋晉侯及秦師戰處即今彭衙

里路史云衙嬴姓國穆公子采

利鄉侯嬰漢宗室城陽恭王祉子武帝建元四年三月乙

丑封見後漢書利鄉即今史官村

栗邑侯耿夔扶風茂陵人弇弟國子和帝永元三年竇憲

出河西命為左校尉將精騎八百出居延塞直走北單于

庭獲其珍寶財畜乃封夔栗邑侯見後漢書

白水郡公侯莫陳悅代郡人隨尔朱尔與爾通天光下隴

進爵柏人縣公尋改封白水郡食邑五百戶永熙三年岳召悅共

討靈州悅誘岳斬之宇文黑闥遂總岳部入隴征悅悅自縊死見魏書

白水縣伯梁禦武川人與尔朱天光共平關右封白水縣

伯邑三百戶見周書

白水郡公王欒未詳何許人開皇時封白水郡公見隋書

白水郡公楊武通華陰人討西南夷有功封白水郡公見隋書

書後歷岷蘭二州總管見華陰縣志

白水縣伯尙可孤東部鮮卑宇文之別種上元中自賊所

歸封白水縣伯後以收長安功進爵馮翊郡王見唐書本傳

白水縣志

卷之一地理

疆域

十八

風俗

縣民性剛而好鬪輒起爭訟然尙懼罪畏法無狼戾險深之習士兼耕讀敦尙儉樸無孔道滑麗氣農力稼穡不事商賈最貧者爲人下井窆煤終年處深科中唐突面目漆黑難辨

歲元旦清明七月望日十月朔日長至日與凡神誕令節士庶家皆設酒果麪食謁神祀祖上墳拜墓其貼門插戶紙札焚掛等類隨時異名大略與鄰邑同吉凶慶弔疾病祈禳鄉民每隔數年率衆同往武當山進香歸則釀金勒石婦女當春節赴西安城隍廟炷香男女同行

滿載

及觀風雲雨雪以占年穀豐熟亦無大別惟正月二十一日各村男婦赴杜康廟賽享至晚而罷二十三日傾城男婦往百子廟一在紫清宮後一在興教寺東祈嗣是夕然樹燈放花爆又三月十八日男婦皆出城東門外后土廟祈嗣住遠鄉者亦至焉又寒食清明此三日婦人不做工偕女兒在衢巷邊作鞦韆戲又二十八日往太嶽廟賽享遠近男婦接踵而行非不禁之難驟變也

締昏當慎之於始鄉民無論深識淺交杯酒而定不拘酒布穀麥皆當聘金甚或以債欠准折空言無據一旦失權

白水縣志

卷之一地理

風俗

十九

輒至背盟構訟

昏禮首重親迎鄉民富厚者間行之貧家惟用一肩輿及三五役夫往娶而已婦入門卽與壻同拜天地次拜祖宗到晚親賓引壻婦就筵舉盞交酌名曰煖房次日新婦拜見舅姑及諸尊長親屬越三日備禮與壻同至母家謂之回門

居喪不鼓樂不作佛事不食肉飲酒禮也鄉民父母歿凡遇殯葬戚友畢至量給白帽孝衣又設酒席相款孝子飲啖無異平時且張搭高棚遍掛紙札樓臺人物加以音樂

戲劇習以爲常

葬埋多用寒食日嫁娶多用臘月二十四日鄉民謂周年惟此兩日不用卜

葬不擇地亦不擇木稍富者乃用柏棺旣窆築土爲堆不樹不碣或子孫零落世遠年湮被人犁毀又或數代同坵無家譜可考往往昭穆不辨

禮度人不立廟而就家園隙地構數椽以妥先靈分不爲僭鄉民凡遇元旦多在縣市中茶店酒肆懸先代影圖宰猪以祭祭畢則羣飲分胙而散

白水縣志

卷之一地理

風俗

二十

麥熟後父母必迎女而勞於家七夕男家必饋女家儀貧富皆然

塾師遇門徒入泮無分貧富皆索酒食謝金稍不愜意卽以倍師加之

改醮之婦聘金比閨女不啻十倍文約率署曰賣夫家伯叔母家兄弟及說合之媒人必皆私納數金令書名畫押乃保無語

兄弟無後義當立嗣鄉民惟圖瓜分財產不論昭穆不問親疎浮議沸騰甚有以異姓而混爭者

禮吉凶不相雜白色惟喪凶之服用之鄉民當炎暑時多戴白藤帽四時率戴白布巾雖元旦佳節與昏娶吉筵亦不避婦女好穿紅裙必以白布纏首不知何倣或曰西方屬金金色白故尚白豈其然

縣四鄉陵阜廣平綿亙村民隨高下窆穴而處卽詩所謂

陶

古窑字

復陶穴也成周之舊上古之風存焉

古言星土又言風土者何星發爲風風出乎土也土之所限山川異氣五行異位民生其間以其土之剛柔而成質卽以其風之強弱而成性性質具而嗜好生嗜好

白水縣志

卷之一地理

風俗

二十一

生而習尚別自廬舍衣食以及昏姻喪紀奢儉華樸雜然不齊一如箕畢之異好而且公私誠僞因乎上之所行以爲向背於是俗之美惡遂如南轅北轍之分途而出矣夫美俗宜守惡俗宜變一家之俗家長主之一鄉之俗士大夫主之一邑之俗邑大夫主之白水之風俗尙近淳樸而重利輕義不洗三秦之舊夫獨非成周之遺民也哉是在官斯土者正本清源以倡之明禮講讓以導之庶人人皆知修名節尙廉恥而風俗斯美耳

物產

無他珍奇是充方物卽常有者亦種植不廣

穀之屬七

黍大暑種孟秋熟其穗散垂有丹黃黑白四色性軟而黏鄉民取以釀酒謂之黃酒米

稷穗攢簇成毬皮較鄰邑略厚有丹黃黑白四色黏不黏兩種黏者性軟可釀酒不黏者性硬疏爽香美可供祭祀故又謂之糶

稻一名秣有赤白兩色早晚兩種不黏者曰秈黏者曰糯右謂之秈秈宜飯糯宜酒邑地不宜糯以釀酒者皆黃粳米也種宜水地西河有

白水縣志

卷之一地理

物產

二二二

梁穗大有毛粒比稷略粗種宜高坡故曰高粱有赤白二色可爲飯亦可釀酒然邑地種此絕少

黍之赤者曰夔音門通作糜鄉民讀作糜呼爲糜子不知

其爲黍也稷與黍形性迥別他志言關中人謂稷爲糜是認稷爲黍矣或曰酒黍爲黍飯黍爲稷是有黍而無稷矣有謂黍乃稷之黏者則是有稷而無黍矣是皆相沿而失之他志有岐秈與稻爲二者有專以糯爲稻者按字林秈卽今稷字稷又通作粳糯卽今糯字稻之黏者曰糯不黏者曰秈一物而數名也他志有以梁之毛

短粒小者為粟或以稷稻之名秫者為粟馬谿田省志

論云禮稷曰明粢粢稷粟本是一物三名後人圖為舒

散之穗則黍也善長謂粟為穀之總名黍稷稻粱槩言

之皆粟也分言之稻乃粟之大者黍稷粱乃粟之小者

粟穀有大小故粟米亦有大小也穀初以陽生為苗苗秀曰禾禾秀而實謂

出甲謂之粟米孟子曰有粟米之征又曰菽粟如火

菽豆也粟非單指稷言谿田專以稷為粟亦非然俗所

稱粟穀粟米正稷穀稷米也舊志載稷又載粟尚沿俗誤渭南山陽等志不載粟

之得

白水縣志

卷之一地理

物產

二十二

麥芒穀味鹹性微寒有大小兩種大麥比小麥芒長粒粗

鄉民用作麥酪亦為酒酢俗作酬醋之醋非小麥色白者曰白麥

紫曰紫麥無芒者曰和尚麥凡作饅饅頭湯丸糍餌餛

飩扁食餅餠餠與餠通水引切麪也之類皆用之二麥秋種冬種

冬月雪盛泥水相化麥根埋藏土中得地氣透足至春倍

加長茂顧寧人謂秦宜雨善長謂秦尤宜雪雨利禾雪利

麥鄉民不食大米飯以麪作饅饅頭之類皆曰飯切麪小弱如縵瀹温湯食之甚清美有曰青稞

比大麥粒微小而青有麪無麩可釀酒有曰菽俗作蕎麥一

名烏麥麪白味甜有苦者中伏種九月熟密種子多稀則少

中秋無月則不實性又畏霜一種曰野稷似麥有毛而細卽燕麥也亦名雀麥

豆有大小兩種大者有黑白黃褐青斑六色俱可榨油作

乳俗曰豆腐黑者入藥小者有曰黑小豆本名穠豆穠野生稻

此豆本野生故借名有曰綠豆有曰白小豆有曰赤小豆

其枝葉似豇豆莢比綠豆莢差大入藥用有曰豌豆種自

回鶻國來有青白二色久貯則黑鄉民多以飼畜亦以和

粳米粥及爲粉有曰豇豇通作豇降平聲豆又曰蠶豆以莢皆雙

生而名子微曲如人腎形有曰菹豆莖葉花俱小每莢子

白水縣志

卷之一地理

物產

二十四

二生青熟紅其形扁小故俗名扁豆取以爲粉及雜炊飯

粥甚佳又有曰登登通作瞭音勞豆莢長如劍俗名刀豆與豇豆

皆常作蔬

麻古曰藁其實曰苴子色白可取油者曰油麻俗曰小麻以其

子多脂味甘亦曰脂麻色黑稜多者大宛國種俗謂之胡

麻一名巨勝子可入藥白水少種有曰大麻古謂之漢麻

以別胡麻卽火麻也子青斑色可取油不甚可食一種曰

縑通作縑麻有花無實俗謂之花麻可爲繩

之屬一十有四

柿

材通柿俗作柿非柿音費木片也

出縣東北鄉者佳形圓無

治

癰最效

核扁而堅八九月經霜色赤冬月摘下以

浸

去澀味乃可食鄉民剝去其皮日晒夜露將乾之中待

生白霜取出如餅謂之柿餅鄉民歲藉此賣錢供稅亦以

釀酒

栗高似櫟實如小栗圓而尖味似核桃

方以智通雅云鄭玄以廊坊多榛故

字從秦非也秦辛皆聲耳

柰子形似紅果微尖味甘七月間熟一蒂數實而被風輒

搖落故鄉民少植

白水縣志

卷之一地理

物產

一二十五

棗子棘之實也肉鬆而甜鄉民以酒醃之謂之酒棗一種

曰棗荆叢生道旁實小而酸可作酢其仁可作藥

梨多核種之生一二梨餘皆成杜實小色赤而味澀然是

梨種故曰杜梨白水所種者杜梨也與乾州温塘蒲城村名出

者異

桃子比杏大而有毛其小者曰石櫻桃皮薄味甘一名崖

蜜卽說文之鬻桃禮之含桃也以鬻所含食而名南紀莊諸生王

顯元園中有碧桃樹一株開花成實不多其形色與常桃

小異

杏大宛國種子味酸不堪食仁亦有甘苦之別甘少苦多甘可生食苦有毒生食者死以滾水沸去苦味再以冷水浸之方醃作菹杏多實不蟲者來年秋善五木者五穀之先也

林檎二月間開粉紅花子如柰而圓小七八月熟色微黃

味香甜一名來禽以能來衆禽而名通雅云古來音近離離林聲相訛耳其

小而稍酸者熟時色紅沙果也俗謂之花紅

葡萄大宛國種有黑白兩色肉味不佳

栗一作榧如榧而小秋間實熟時自落故夏小正曰八月栗

白水縣志

卷之一地理

物產

二十六

零

檳子形似林檎熟時色紅味微酸而香鄉民謂之紅果又

曰聞香果

石榴塗林安石國種其子畱結如瘤故謂之石榴與余廣

東所植無異

頻果花紅如柰實似紅果微平熟時半紅半白光潔可愛

李賊入關檄取甚多民大累爭伐其樹云頻果與廣東頻

婆異頻婆實紅色似肥阜核如栗煨食之味與栗同

核桃畢占國種故一名胡桃縣西鄉所產者皮薄而肉白

味較他處獨佳

李子與南方形味無異縣地無梅鄉民皆稱李爲李梅
蘇之屬九

甜瓜以味香甜而名俗名蜜罐子

西瓜五代時胡嶠得種自回紇縣地所生小於鄰邑色味亦不及

菜瓜色青綠亦有條而斑者醃作菹最佳其先綠後黃者西域種本名胡瓜以避石勒諱改稱黃瓜鄉民多生啖之他志有以黃瓜爲王瓜者按王瓜本禮記月令野生大如

白水縣志

卷之一地理

物產

二十七

核桃入藥用或云瓜之首出者曰王而白水黃瓜皮略厚近秋始繁結

冬瓜蔬音及瓜也至冬熟皮白如粉子比別瓜獨多色亦白

故又名白瓜味最清芳

南瓜本倭國種故名倭瓜又名番瓜大如西瓜有稜形色不一肉厚色黃經霜味極甜美他志云與羊肉同食能殺人

絲瓜架而垂生長至一二尺嫩者調羹甚美至老則筋絲羅織如網鄉民取以滌器

瓠

一作瓢

一曰壺盧又曰蒲盧蒲盧土蜂也其腰細瓜形象之故名一種曰木壺盧苦不可食鄉民剖而乾之以為

水瓢又一種曰藥壺盧取作茶酒器亦不食

瓠瓢舊志作葫蘆非葫通

葫蘆蒲也蘆蘆葦也葫有茭蘆有笋俱可食但非瓜類

瓠子苗葉花俱如壺盧結實長一二尺氣味略似冬瓜先

壺盧成

古壺匏瓠音通陳善捫虱新話以匏瓠瓠蘆為一類

茄子新羅國種一名落蘇又名崑崙瓜有紫白二色圓長

不一其白者曰水茄以甜醬醃之壓而取油曰茄油調羹

醃肉最佳

白水縣志

卷之一地理

物產

菜之屬一十有五

白菜

凌冬晚凋有松之操故謂之晚菘

古謂菜為菘

又曰冬菜

種自安肅縣來再種色味即變地氣使然也

芥菜氣味近辛烈色青紫有毛夏種秋成鄉民多以作菹

又為齏

蒸

俗作甜

菜

一名菘蓬菜葉似白菘而尖小微帶土氣蒸食

頗美

菠薐

白頗稜國來

後人訛頗稜為波稜又加草為菠薐

根赤性冷能解酒毒

蔓菁

一作蕪菁蔓蕪古音通

苗心根俱香辣有味可醃作菹鄉民取

以雜炊米飯荒年藉以療饑子亦可供燈油之用

蘿蔔或作萊菔又作蘆
葩菔葩皆音北一名拉逮狀其形也有赤白二種

味辛去毒苗曰紫菘又曰温菘可醃作菹

薺菜多長麥地中以冬水生以夏土死枝葉細靡古謂之
靡草又名甘草師曠占云歲欲豐甘草先生是也鄉民謂
之花薺菜性冷味甘宜和羹

萵苣以來自周國而名葉尖小而白背帶紫色其心圓而
長者曰萵筍調羹作菹為蔬中上品

至於**蘆**俗作
莞非**菱****茼蒿****藜子**即茴
香**蒔蘿**即小
茴香**蔥****菲****蒜**皆鄉民

白水縣志

卷之一地理

物產

所常餐者而白水地高陰春分後始甲拆蔬果與五穀皆
較他邑早種遲收徒靠天時不盡人力可乎

木之屬一十有六

桐有六種各鄉所植皮白葉大五六月開白花而結子者
白桐也一曰泡桐又曰榮桐榮華也宋甯參有咏榮桐詩

見藝
文志一種葉尖小者不花

柏廟宇墳墓多植之凡木皆屬陽柏獨向陰指西西金色
白故字從白其葉圓者曰圓柏扁者曰扁柏有柏葉松榦
而多刺者謂之刺柏即**檜**也其結子者曰**栝**皆理直後凋

槐葉小而綠六七月間開黃花白水槐樹八九月間結實

可作色鄉有榦大至十數圍者其根盤拳鞣轆龍爪槐也

柳有檉一作柜柳杞柳蒲柳之別枝堅韌可屈為柳斗其近

水生須而枝悠揚者曰**楊**有青白兩種亦名檉柳蓋楊柳一類

也

榆類甚多白者曰粉先葉後莢有先生圓莢者俗謂之榆

錢子曰夷或作黃味頗辛香可食

楸皮白無子葉大於榆至秋垂條如線其疏理而生花結

實者**梓**也

白水縣志

卷之一地理

物產

三十

穀穀與穀構通榦高皮駁實如楓實熟則通紅一種皮白葉長

有瓣而實小其樹不高謂之扁穀即**楮**也皮可作紙

椿有花無莢木皮細肌實而赤嫩初生之葉香甜可供茗

王志謂鄉民懲吏求之苦斬伐幾無遺蘖貪得苟取為民之蠹即此可以類推

樗木理疏其葉似椿然氣臭不可茹俗謂之臭椿山樗曰

栲中虛易腐莊子所謂擁腫不中繩墨者也

阜角枝榦多刺葉似槐而尖瘦結莢似豬牙肉多脂而黏

四月四日鄉民多摘其葉佩之謂能已目疾云

此外雜木四鄉溝澗頗多而不足供棟宇牆榦車版之用
生秦山者未及長大鄉民伐以燒炭供爨今已濯濯用作
室者率購之渭南馱運而至亦勞甚矣

藥之屬

有丹葎俗作參沙葎紫葎俗訛為苦參玄葎莖實皆黑山樅俗訛作查

秦芫蔚即益母草菴藟即骨碎補栝樓即天花粉芪母俗作知母地榆一名玉

蕪黃氣兔葵花曰欵冬紫赤色龍莎麻黃也根牽牛初生

父牽牛換藥故黃精以得坤土之精粹而名他志云須荆

芥苾葫柴古葛根車前天南星以其根似鼠黏子俗名大

白水縣志

卷之一地理

物產

三十一

名牛赤石脂出田家河墓頭回形昧詳原始本艸一僧以此治

同故菟絲子天薺通作門俗冬其最繁而佳者棘菟即詩

俗名遠志出倉頡墓左右蒼朮出秦山銅芸即防風出阿黃芩出普陀

酸棗仁出虎頭溝資身養生之一助也名醫別錄載白水

今縣內無之
府志誤載

花之屬

葵菊萱為多牡丹漢稱木芍藥芍藥玫瑰薔薇石竹花似剪春

珠秋玉簪雞冠亦間有之然色香大不如鄰邑艸木結實

艸之屬

適用者四蓬葦苜蓿紅藍也蓬蒿類有綿刺二種子爲麩

可療饑見二申野錄葦爾雅讀平聲鄉民讀作御去聲乃葭蘆之既成者大者

中空小者中實鄉民取以覆屋編壁及爲簿席之類苜蓿

一作牧宿又作木粟太宛國種鄉民飼畜常芻也初生葉嫩可作菜

紅藍亦西域種夏開紅花收而曝乾以染真紅俗名紅花

毛之屬

牛馬羸驢羊豕犬貓家所常畜在野則有狼狸兔黃鼠羊

之耳小如蠶形者曰蠶耳羊種出府城肉味不羶兔孳尾

無異他獸古云視月而孕其子吐生不確詳見知縣鈕琇觚牘所載原字

白水縣志

卷之一地理

物產

三十一

說兔黃鼠一名沙鼠至禾熟時食穀而肥又名禾鼠其肉最

益小娃鄉民稱小兒爲娃脾氣已疴疾

羽之屬

雞鴨亦家常畜鵝間見山雞野雞出縣北山他處無若慈

烏烏即鴉也白鴿斑鳩鵲麻雀黃鸝燕子鷹鷂所在有

之山雞一名崖雞似鷓鴣而大非吐綬之鷓鴣也野雞雉

也漢避呂后嫌名改稱野雞至今沿之黃鸝啼則兩鄉民

呼爲水鴉兒

鱗之屬

小魚出河西 不知其名長不及二寸不堪食

介之屬

蠶出西河及鐵牛河 鄉民不食有小石蠟出西河 以麪煮食頗可否

則令人嘔逆

蟲之屬

蛆 蝶蜈蚣也 蜥 蜴在屋曰守宮 蜘蛛 蚯蚓鄉民謂之曲蟪 蜚 蝗 蝙蝠

魚 蟬 蛾 蝶 蠅 蚊 蚋蚋比蚊形小而響細一名蠓蠓鄉民呼為蠓蟲亂飛而旋主風衝主雨

蠍形類蠍虎而小好緣牆壁土坑 蜂大而蜜者謂之壺

乃獨少蠶故鄉民無絲紬之利

白水縣志

卷之一地理

物產

三十三

至於雜用常需之物則有土粉出田家河 石灰石 礧出漢積東

顧兩村 煤炭或稱石炭出西南 窑器出西河坡 蜂蜜 花椒 辣椒 八

者 煤炭 鑿井深三四百尺取之足供炊爨兼資販易然日

久漸稀今惟馮雷莊及大雷公村新井最旺云煤井傭工人入穴取

炭有被石壓死者屍親多藉此詐索銀錢知縣劉令貽斷令井主給棺木銀四兩布二匹載劉令貽去思碑 花

椒各鄉皆有之初種如薔薇及長高可盈丈枝密葉繁有

刺初夏花初秋實似茱萸而小色微赤氣味辛香可和飲

食亦以入藥秦椒紅大而長兩兩對垂鄉民謂之辣子本

作茶古蔓生今成樹故字從木

白水縣志卷之一地理終

白水縣志

卷之一地理

物產

三十四